

# Rapport dil cussegli da scola

Autor(en): **[s.n.]**

Objekttyp: **Article**

Zeitschrift: **Annalas da la Societad Retorumantscha**

Band (Jahr): **89 (1976)**

PDF erstellt am: **20.09.2024**

Persistenter Link: <https://doi.org/10.5169/seals-232150>

## Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Ein Dienst der *ETH-Bibliothek*

ETH Zürich, Rämistrasse 101, 8092 Zürich, Schweiz, [www.library.ethz.ch](http://www.library.ethz.ch)

<http://www.e-periodica.ch>

# Rapport dil cussegli da scola

Nus espruein d'empunir il fil leu nua che nus vein interrut el en il davos rapport annual. Quei per orientar tut ils interessai davart la scolaziun da nossas mussadras sco era per segirar ina cuntuaziun el program d'instrucziun.

Ils 30 d'uost han 26 candidatas fatg igl examen da recepziun els roms teoretics a Cuera. La secunda jamna da settember han ils examens practics giu liug en differentas scolettes. Il cussegli da scola ha acceptau 11 scolaras che vegnan ad entscheiver il cuors da dus onns igl atun 76. Calonda settember ha il secund onn da scola dil cuors current priu sia entschatta. Ils 10 da settember vein nus giu la honur da beneventar la presidenta e la vicepresidenta dall'«Uniun svizra per scolettes». Quei ha legrau nus zun fetg, essend che nies seminari ei renconuschius dapi il zercladur 75 dalla suranumnada uniun. Ils 19 da settember han las scolaras giu ina sentupada cun signur Aebi dalla Pro Juventute. Quei ha dau caschun da rapportar e discussiunar davart il practicum social pretaus el decuors dalla stad 75. A caschun dalla radunanza annuala dalla CMR che ha giu liug ils 3 d'october a Cuera ha dr. R. Büeler referiu a mussadras e scolaras sur las «malsognas d'affons». Suenter las vacanzas d'atun han las scolaras cuntuau l'instrucziun regulara per lu serender igl entir meins da november el «practicum intensiv». Quel ei vegnius preparaus e survigilaus sco adina en moda conscienciusa da nossa directura. Returnadas a Cuera, han las scolaras giu la caschun da visitar duront il meins da december pliras scolettes dil marcau.

Per la fin da schaner ha sora Florentina instradau per la CMR e per las scolaras in di da lavur cun dunna Lorenz, l'instruidra da ritmica en nies seminari. Quella ha mussau e demonstrau las pli differentas pusseivladads da far gimnastica culs scolarets. Il centrum da sport da Magglingen ha fatg cun quella caschun ina exposiziun da mieds d'instrucziun per gimnastica e ritmica en scoletta.

Ils 15 da mars han las scolaras dil «seminari da mussadras dil marcau da Turitg» visitau nossa scola. Sora Florentina ha menau las scolaras e lur magistra tras las scolettes d'exercezi e rendiu attentas las visetas als problems specifics da nies seminari. Duront in gentar communabel han las scolaras dau perdetga en producziuns vicendeivlas da lur atgnadads particularas. Gia ils 26 dil medem meins ein nossas scolaras serendidas a Basilea per visitar la «Didacta». Quella exposiziun presenta denter auter era ina reha schelta da mieds didactics per las scolettes. Sin lur retuorn a casa han las Romontschas rendiu cunterviseta a lur collegas ed amitgas da Turitg. Aschia han ellas giu caschun da prender investa el menaschi da scoletta d'in marcau grond. Nossa directura ha, sco ins percorscha, aviert eschs e portas el scomi da patratgs ed ideas per aschia mitschar dalla

stagnaziun ed isolaziun romontscha. Ina tenuta che meritass da veginr imitada!

Sursegliend tiarms e datums, lein nus aunc menziunar ch'ils examens finals dil cuors current han liug l'entschatta da fenadur. Il vent da recessiun trai era tier nus, aschia che buca tut las diplomandas han saviu veginr casadas definitivamein tochen oz.

Suenter quella enumeraziun da datums impurtonts resta ei aunc da far menziun d'entgins problems da muntada principiala: Per gl'avegnir veginan treis inspecturas regiunalas ad inspectar las scolettas romontschas. Per la Surselva ha la mussadra Dora Cavelty surpriu il pensum, ferton che dunna Marietta Bearth tgira il Grischun central. Las scolas ladinas vegin dunna Seraina Roner ad inspectar.

Plaunet para l'erecziun d'ina nova scola grischuna per dunnas da serealisar. Cu il niev edifeci stat en pei a Cuera ei il mument per integrar nies «seminari da mussadras» cun l'instituziun cantunala arrivaus. — Nus essan pertscharts e decidi da pretender ina partiziun autonoma romontscha per nossas mussadras. En in memorandum al departement d'educaziun vein nus motivau nies giavisch e skizzau in plan d'instrucziun detagliau per in seminari da mussadras romontschas. Il mument decisiv sperein nus da veginr risguardai sco ei descha al secund lungatg ufficial grischun.

Deplorablamein stuein nus concluder nies rapport cun in fatg pauc legreivel. Sin giavisch dalla claustra d'Ingenbohl banduna sora Florentina nies seminari cun la fin digl onn da scola current. Sora Florentina ei entrada en nies survetsch in mument da gronda crisa igl atun 71. Cun curascha, bien inschign e lavur stendida ha ella surmontau las difficultads. Sut sia direcziun ein ils cuors reduci carschi ad ina scolaziun cuntuonta da dus onns. Il program d'instrucziun ei vegnius slargaus ed amplificaus, damaniera che nossa scola ei daventada in seminari renconuschiu sin plau svizzer. Quei ein merets incontestabels da sora Florentina. Nus selegrein dil cuntionschii, engraziein alla directura partenta e giavischein vinavon tut bien sin la via futura.

En sia sesida dils 7 da fevrer ei il cussegli da scola s'occupaus dalla damonda da successiun. Dunna Ursi Nigg-Jemmy, ina anteriura scolaria da nies seminari, ei veginida engaschada per in onn d'emprova sco scolasta da metodica. Il pensum ei amplificaus per ina part dallas incumbensas d'ina directura. En la medema sesida ha il cussegli da scola elegiu giuvna Heidi Cathomen sco successura da giuvna Jacobina Nadig en la scoletta sursilvana a Cuera. Nus engraziein a giuvna Jacobina per la buna lavur prestada e giavischein ad ella tut bien el stan da lètg. Giuvna Heidi vegin a surprender sper la scoletta la survigilonza digl internat e segidar tenor pusseivladad cun dunna Ursi Nigg-Jemmy. Da principi vegin igl internat manischaus vinavon dallas scolaras sezzas.

Per conclusiun s'auda in sincer engraziament allas scolastas e scolasts dil seminari sco era als collegas dil cussegli da scola che prestan buna e conscienuusa lavur.

Theo Candinas